



**GABINETE WEVER-CROES**

**PROME 100 DIA**  
E base di bon gobernacion

**25 FEBRUARI 2018**



**GOBIERNO DI ARUBA**





# INTRODUCCION


E resultado di eleccion democratico, di dia 22 di september 2017, a duna e partidonan MOVIMIENTO ELECTORAL DI PUEBLO (MEP), PUEBLO ORGUYOSO Y RESPETA (POR) y RED DEMOCRATICO (RED) un mayoria total di 12 asiento den Parlamento di Aruba.

E partidonan MEP, POR y RED a asumi nan responsabilidad y a yega na un Acuerdo di Formacion dia 17 di october 2017.

Dia 1 di November, partidonan a firma un programa di gobernacion “Hunto pa Aruba”, na pia di Hooiberg, den cual a pone por escrito e base di e gobernacion MEP-POR-RED 2017-2021.

Despues di a yega na acuerdo pa cu reparticion di cartera, y a pasa e proceso riguroso di screening, Gabinete Wever-Croes a huramenta dia 17 di November 2017. 8 minister e dia aki a presta huramentacion dilanti Gobernador.



A portrait of Evelyn Wever-Croes, the Prime Minister of Aruba, seated at a desk. She is wearing a white blazer over a white top, a gold necklace with a large circular pendant, and gold earrings. Her hands are clasped in front of her. In the background, there is a potted plant and the flag of Aruba.

**“ Pa prome biaha den historia  
di nos pais, Aruba a conoce  
un Prome Minister femenino,  
y despues di 20 aña, Aruba a  
conoce un gobierno di coalicion.  
Prome Minister Evelyn Wever-Croes**





**Prome Minister Sra. Evelyn Wever-Croes**

**Minister** di Asuntonan General,  
Integridad, Energia, Innovacion  
y Organizacion Gubernamental



**Vice Premier**  
Sr. Otmar Oduber

**Minister** di Infraestructura  
y Medio Ambiente



Sra. Xiomara J. Maduro

**Minister** di Finanzas,  
Asuntonan Economico  
y Cultura



Sr. Glenbert F. Croes  
**Minister** di Asunto  
Social y Labor



Sr. Andin Bikker  
**Minister** di Husticia,  
Seguridad y Integracion



Sr. Armando Lampe  
**Minister** di Enseñansa,  
Ciencia y Desaroyo  
Sostenibel



Sr. Danguillaume Oduber  
**Minister** di Turismo,  
Salubridad y Deporte



Sr. Chris Romero  
**Minister** di Transporte,  
Comunicacion y  
Sector Primario



GOBIERNO DI **ARUBA**





# BON GOBERNACION

E calidad di nos democracia y nos institutonan democratico ta depende di un structura transparente, basa riba proteccion di derechonan humano, respet pa e necesidadnan y libertadnan di nos ciudadanonan, fortificacion di nos estado di derecho y instancianan di control, responsabilisacion y bon gobernacion ("accountability and good governance"), como tambe eliminacion di corrupcion y discriminacion. Pero mas cu tur cos, democracia di nos pais y bon gobernacion ta depende di e capacidad y integridad di esnan cu ta ocupa posicionnan clave den e structura y institutonan menciona, na unda gobernantenan ta responsabilisa nan mes pa nan actonan y funcionamiento den e aparato gubernamental. Den esaki Parlamento mester cumpli debidamente cu su tarea di controla gobierno. Ademá lo institui un departamento pa promove integridad gubernamental ("Bureau Integriteit").



“ Apesar di un traspaso caotico, e team nobo den gobernacion a traha cu determinacion y entusiasmo pa pone tur cos na ordo bek pa asina Bestuurskantoor por a cuminsa funciona na forma optimal.







# TRASPASO

Traspaso di gobierno anterior pa e nobo a bay sumamente caotico cu a haci dificil pa cuminsa traha di inmediato. Cualquier gobierno cu ta respeta su mes, lo a percura pa un traspaso debido, informando e sucesor di e casonan pendiente, y temanan coriente.

No e gobierno anterior. Algun minister a laga un lista skirbi riba un A-4, pero otronan no a laga nada. Ningun documento a wordo traspasa. Cada minister mester a cuminsa for di nada.

Ta obvio cu Gabinete Eman kier a laga tur cos mas caotico atras posibel pa stroba e gobernacion nobo. No solamente nan a laga oficinanan bashi, pero loke ta mas serio ainda ta cu full e parti pabou di Bestuurskantoor bieu a wordo condena pasobra e ta den masha mal estado y no por wordo uza por lo pronto.





# CRISISNAN DI 100 DIA

## ➔ **CRISIS FINANCIERO:**

Despues cu e cifranan real a bira conoci y a resulta cu e deficitnan pa 2017 y 2018 tabata enormemente halto, Gobierno mester a ahusta su prioridadnan. Mesora a bira obvio cu mester studia e situacion bon, y presenta e cifranan real na comunidad. E crisis aki a haya atencion constant desde e prome dia te cu awo ainda.

## ➔ **CRISIS SOCIAL:**

Apenas un siman despues cu Gabinete Wever-Croes a huramenta, e noticia tristo a drenta di morto di un baby, y despues di su ruman, ambos a causa di violencia domestico. E morto cruel di e dos angelitonan aki a shock henter nos comunidad, y desde e momento ey tur hende a realisa cu no por pospone mas pa atende cu e problemanan social den nos comunidad.

## ➔ **CRISIS CU VENEZUELA:**

Asina cu aña a habri, Presidente Maduro di Venezuela a anuncia cu ta cera frontera aereo y maritimo entre Venezuela y e islanan Aruba, Bonerio y Corsow pa motibo cu especialmente Aruba lo no ta haci suficiente pa combati contrabando di Venezuela.

Venezuela lo a pidi Aruba ya desde 2016 pa coopera den e lucha contra contrabando di Venezuela, pero segun presidente Maduro, Aruba no a haci suficiente, y pesey a tuma e medida di cera e frontera. E fronteranan ta cera ainda, apesar di varios intento di parti di Gobierno di Aruba, hunto cu gobierno di Reino, pa yega na entendimento.





“ Den lus di e crisisnan aki,  
cada minister mester a traha,  
cada un riba nan tereno.  
Apesar cu 100 dia no ta  
suficiente pa logra e metanan  
cu a compromete den e  
programa di Gobernacion,  
y apesar cu e prome 100  
dianan a wordo mas categorisa  
pa atende un crisis tras di otro,  
cu hopi orguyo Gobierno ta  
anuncia e logronan den e  
prome 100 dianan.

crisisnan di 100 dia





E prome dia di trabou,  
dia 20 di november, a cuminsa cu bishita di  
Obispo Luis A. Secco y  
Pastor Totti Fuentebella,  
kendenan a bendiciona e luga di trabou  
di e ministernan.

Desde e momento ey, ministernan di  
Gabinete Wever-Croes ta trahando  
incansablemente pa bienestar di nos pais.





GOBIERNO DI *ARUBA*

**GABINETE WEVER-CROES**

PROME 100 DIA  
E base di bon gobernacion

**25 FEBRUARI 2018**





GOBIERNO DI ARUBA



Nos ciudadanonan a  
cuminsa sinti e cambio y e union.  
Aruba tin retonan hopi grandi nos dilanti.  
Uni nos lo enfrenta e retonan aki.  
Y uni nos lo vence e obstaculonan  
den nos caminda.  
Cu Dios bendiciona cada ciudadano  
di pais Aruba.

---

**Prome Minister**

Minister di Asuntonan General, Integridad, Energia,  
Innovacion y Organisacion Gubernamental





# ✓ 100 DIA DI GOBERNACION

## 1 SER HUMANO CENTRAL

- \* Apertura di Oficina di Gobierno na San Nicolas:  
Servicio mas cerca di e ciudadano
- \* Maneho di Energia dirigi riba baha gasto di awa y coriente
- \* Solucion pa famianan di menos recurso cu no tin conexion di awa y coriente

## 2 REESTABLECE CONFIANSA, CREDIBILIDAD Y BON NOMBER DI ARUBA

- \* Relacionnan internacional, den Reino, Venezuela y demas paisnan
- \* Comienso di independisacion di institutonan di estado, Parlamento, Algemene Rekenkamer, Raad van Advies
- \* Integridad, e fundeshi pa bon gobernacion y mas transparencia
- \* Maneho di personal dirigi riba mas eficiencia y mas productividad
- \* Reduci gastonan di presupuesto, manera comprometi, dunando e ehempel

## 3 VISION PA FUTURO

- \* Innovacion, y nombramento di Chief Innovation Officer
- \* Plan Nacional di Innovacion hunto cu tur ministerio y sector priva
- \* Mobile Tec Lab





GOBIERNO DI ARUBA



Mi tin un ambicion enorme pa haci diferencia y trece cambio, cual ta locual cu comunidad a pidi p'e. E meta di mi maneho nobo ta pa tur ciudadano sa nan derecho a base di transparencia y igualdad cual lo crea den e proximo añanan un balansa, enfocando riba cuido di naturalesa y medio ambiente.

---

**Minister** di Desaroyo Teritorial,  
Infraestructura y Medio Ambiente





# 100 DIA DI GOBERNACION

## 4 PUNTO DI ENFOKE

Pa marca e direccion di Ministerio di Desaroyo Teritorial, Infraestructura y Medio Ambiente (MinROIM) pa cu e proximo 4 añanan a identifica 4 punto cu actualmente ta punto di enfoke di e ministerio.

- 1 Un maneho integral di desperdicio.
- 2 Construcción di 1000 vivienda di cual minimo 200 lo ta pa cas social.
  - **CASNAN MAS ECONOMICO:**  
Organisacionan manera Fundacion Cas pa Comunidad Aruba (FCCA) como tambe organisacionan nobo a wordo acerca pa asina crea casnan mas economico pa e generacion nobo y lo tin mas o menos 500 tereno cu lo mester sali for di DIP. Importante ta pa menciona cu e topico di tereno ta un topico hopi comenta den comunidad.
  - **MANEHO DI TERENO:**  
Lo percura pa tin un maneho hopi cla riba kico ta e rekisitonan pa por yega na un tereno di cas y cu esaki ta transparente y husto pa tur hende. Asina evitando cu negoshi por wordo haci cu terenonan manera cu tabata tuma luga den pasado.
- 3 Atende y soluciona 50% di problema di infraestructura di caretera.
- 4 AnCra e asina yama Ruimtelijke Ontwikkelingsplan (ROP) den ley creando e ROPV.

## LOGRONAN:

- 1 Den un periodo corto a logra cera un MoU cu FCCA pa casnan social cu lo bay wordo construi.
- 2 A percura pa dos Request for Information (RFI) a wordo saca caminda cu tin participacion pa mehora e situacion di maneho di desperdicio akinan na Aruba.
- 3 A percura hunto cu colega Minister di Husticia cu City Inspectors lo amplia su tareanan y lo bay dedica na leynan cu no a haya atencion debido manera e 'Ley di Saco di Plastic' y 'Ley di Cacho'.
- 4 A logra tambe pa reactiva tur locual cu a keda para durante e ultimo año pa pueblo di San Nicolas. Ta sumamente contento cu coleganan Minister ta sostiene e desaroyo di San Nicolas, teniendo na cuenta tambe e situacion penoso cu ta aden cu Citgo. Gobierno lo keda dedica pa desaroya San Nicolas como e di dos ciudad economico di nos Pais.





GOBIERNO DI ARUBA



Den su prome 100 dia  
despues di a huramenta dia  
17 di November 2017,  
Gabinete Wever-Croes a logra progresonan  
solido riba su agenda pa trece un cambio  
real y positivo pa mehora e calidad di bida di  
e ser humano biba na Aruba.  
A logra compromiso notabel den e areanan  
di prioridad, mester bisa cu 100 dia sigur no  
ta suficiente pero e frutonan di nos  
trabaonan nos pueblo lo mira den futuro.

---

**Minister** di Finanzas,  
Asuntonan Economico y Cultura



# ✓ 100 DIA DI GOBERNACION

## 1 FINANSA PUBLICO:

### • ANALISIS Y EJERCICIO FINANCIERO:

Minister di Finansa a laga su departamento y expertonan haci un analisis y ejercicio financiero. Asina despues di hopi aña gobierno hunto cu departamento di finansa a presenta un bista real di e situacion financiero di nos pais Aruba, cual informacionnan ta wordo comparti cu instancianan manera e.o. Centrale Accountants Dienst, Raad van Advies, Fondo Monetario Internacional. Cu e informacion aki riba mesa Gobierno a traha un plan pa yega na un finansa publico manehabel, sostenibel y duradero riba termino largo.

### • REUNION CU INSTITUTIONAN FINANCIERO:

Minister a duna cara y a reuni cu institutionan financiero internacional y inversionistanan y a muestra seriedad den atende nos finansa publico y asina recobra Aruba su credibilidad financiero. A reuni cu Supervisor Financiero esta Caft y Secretario di Estado Hulandes.

### • PLAN FINANCIERO ECONOMICO:

Ultimo a presenta un Plan Financiero Economico cu pronto lo wordo presenta na Parlamento di Aruba y e pueblo tambe lo wordo informa di e plan aki. E meta ta pa structuralmente yega na un finansa publico manehabel, sostenibel y duradero a termino largo.

## 2 ECONOMIA:

### • CANASTA BASICO:

Minister encarga cu Economia hunto cu e Departamento Economico a tuma e prome paso pa amplia productonan di canasta basico. Pa proteha esnan di menos recurso, e Departamento di Asuntonan Economico y Industria ta controla den forma regular prijs di e productonan cu ta cay den e Canasta Basico. Riba e lista di productonan tin e.o. aros, lechi, cuminda pa baby, koffie, te, sucu, azeta, hariña de maishi, etc. Ademá mester bisa cu e prijsnan di pan, webo y pisca ta mara na ley.

### • CONTROL DI PRIJS:

E team di Departamento di Asuntonan Economico, Comercio y Industria a inicia cu control y observacion di prijsnan di productonan den supermercadonan.

### • OBSERVACION DI PRIJS:

Ademá di e control di prijs, e gobierno tin un enfoque tambe riba observacion di prijs y pa e motibo aki e Departamento di Asuntonan Economico y Industria ta manda su controladornan riba caya pa nota prijs di un cantidad di productonan na diferente supermercado. Esaki ta wordo haci cu e meta di compara prijs y informa pueblo via anoncianan den corant na cual establecimiento e producto ta sali mas barata. Esaki lo stimula comerciantenan tambe pa baha nan prijs pa asina keda competitivo y yuda elimina of minimalisa e diferencia den prijs di productonan entre e diferente supermercado.

## 3 CULTURA:

Cultura ta locual cu ta duna pueblo su caracter. Cultura ta e forma di biba y expresa di un pueblo. Den desaroyo di nos pais nos cultura tin un rol di vital importancia y Gobierno tin su responsabilidad den esaki pa yuda promove, sostiene y preserva nos cultura y nos tradicionnan.

### • 2018 E AÑA DI PAPIAMENTO

Minister di Finansa, Asuntonan Economico y Cultura conhuntamente cu Minister di Enseñansa, Ciencia y Desaroyo Sostenibel y Minister di Transporte, Comunicacion y Sector Primario a firma un decreto na unda ta declara aña 2018 como aña di Papiamento.

### • APORTE NA NOS FESTIVALNAN:

Minister di Finanzas, Asuntonan Economico y Cultura ta duna e aporte y realse na e festivalnan di Aruba.

### • RECONOCIMIENTO:

Minister di Cultura ta apoya y duna reconocimiento na nos baluarte y pilarnan cultural. Ta danki na nan tambe ta haci posibel pa nos Cultura sigui biba.







GOBIERNO DI ARUBA



“Nos no por haci  
milagro den e prome 100 dianan,  
pero nos ta traha p'e si  
te ora nos logr'e

---

**Minister** di Asunto Social y Labor



# ✓ 100 DIA DI GOBERNACION

## 1 SOCIAL

- A presenta e Plan Social cu a wordo aproba pa Gabinete Wever Croes cu ta encera 10 medida di accion inmediato. Esaki ta encera entre otro un aumento substancial di e inversion y presupuesto social.
- Buro Sostenemi ta bira e Meldpunt Nacional anca huridicamente.
- A presenta un Plan di ehecucion (uitvoeringsplan) cu a defini e montante di e inversion social y no obstante e crisis grave/desastroso financiero cu Gobierno anterior a laga atras, Gabinete Wever Croes a aproba e implementacion di e Uitvoerings Plan 1 cu lo encera cu e inversion social ta wordo presupuesta pa aña 2018 y 2019 adicionalmente na e presupuesto ya existente pa Ministerio di Asuntonan Social.
- A aproba e beleidsintensivering Gehandicaptenzorg. Cuido pa nos hende special ta wordo intensiva.
- Apesar cu Gabinete Wever Croes ta asumi responsabilidad pa e solucion y salvacion Social di nos muchanan, hobennan, famianan y nos grandinan, asina mes a cuminsa encamina e proceso pa haya apoyo tecnico di profesionalnan di Hulanda.
- A cuminsa cu e Pilot Project Maatschappelijke Participatie Bijstandjongeren entre Sociale Zaken/ DPL/DAO: Esaki ta e comienso di e programa pa yuda hobennan cu ta riba Asistencia Social pero cu por traha pa dreña mercado laboral bek.
- A aproba pa reconecta awa y coriente pa tur famia den necesidad y dificultad bek creando un Fondo Social cu WEB/Elmar/Utilities lo aporta na dje. Departamento di Asunto Social su seccion Guia y Famia lo haci e screening pa asina tur nos famianan por haya nan awa y coriente conecta bek.

## 2 LABOR

- A tuma e decision pa aumenta salario minimo substancialmente.
- A aproba e Autoridad di Supervision, Control y Sancion pa e Departamento di Inspeccion Laboral di DAO pa asina controla tur doño di trabao den tur sector pa cu cumplimiento di e leyman laboral pa asina proteha tur trahador na Aruba sin distincion
- E maneho di Gabinete Wever Croes di trahadornan local y contratistanan local na promer lugá den tur sector, ta den pleno implementacion.
- Departamento di Progreso Laboral, Departamento di Labor y Investigacion y Departamento di Asunto Social, ta trahando estrechamente cu otro pa duna contenido y oportunidad real na tur hoben y ciudadano cu ta cobra bijstand pa mediante e maneho di e Leer Werk Traject tur nos hendenan cu awor ta haya Asistencia Social (bijstand) cu por traha, haya trabao tambe. Mientras tanto cu nan ta forma parti di e training di Leer Werk Traject: Tur bijstandstrekkers lo cuminsa participa den e proyecto di haci trabao comunitario





GOBIERNO DI **ARUBA**



“ Cu honestidad y transparencia,  
nos lo sa di gana bek e confiansa den  
gubernacion, tanto cerca ciudadanonan di  
Aruba, como nos partnernan den reino y  
demas paisnan. Y a base di honestidad y  
transparencia nos lo trece bek orden y  
respet den nos comunidad.

---

**Minister** di Husticia,  
Siguridad y Integracion



# TASK FORCE BEACH POLICY



**DOW**



DIRECTIE SCHEEPVAART ARUBA



Directie Infrastructuur en Planning

**4** Minister a uni hunto y a firma un Decreto Ministerial caminda cu ta institui un Task Force encarga pa actua y percursa cu ordo ta wordo reestableci riba nos beachnan. E Decreto Ministerial ta indica formacion oficial di e Task Force entrante 19 di januari cu ta consisti di e siguiente departamentonan:

KPA, DIP, DOW y Directie Scheepvaart.





GOBIERNO DI ARUBA



“ Ta un privilegio di ta  
parti di Gabinete Wever-Croes y ta  
un honor pa sirbi e pueblo di Aruba.  
100 dia di gobernacion ta mustra di ta un  
gobierno di Accion. Despues di 100 dia  
por mira atras un serie di decision y  
logronan cu sigur ta na interes di nos  
comunidad.

---

**Minister** di Enseñansa,  
Ciencia y Desaroyo Sostenibel





# 100 DIA DI GOBERNACION



## 1 WIFI PA TUR SCOL – DEN CUADRO DI DIGITALISACION

Pa por crea un base fuerte pa profunda digitalisacion di nos enseñansa ta importante pa scolnan dispone di un WiFi confiabel. Ademas di e parti di educacion WiFi lo sirbi pa hisa e seguridad na scolnan door di instalacion di camera y sistema di alarma pa cuida e inversionnan haci.

## 2 INICIO SCOL MULTI LENGUAL

Pa por compronde y domina otro idioma miho ta importante pa tin un base solido di bo idioma materno cu pa mayoria di nos comunidad ta Papiamentu. Den un trayectoria di 10 aña lo percura pa na un forma responsabel introduci nos dushi Papiamentu como idioma di instruccion na scolnan. Otro idioma manera Hulandes, Ingles y Spaño lo sigui prepara nos hobennan pa nan entrada na scolnan secundario y posteriormente pa estudionan avansa tanto local como den exterior.

## 3 DECRETA 2018 COMO AÑA DI PAPIAMENTO (15 aña oficialisacion di Papiamento como idioma)

Aruba ta cumpli 15 aña cu a oficialisa Papiamento. Esaki a nifica cu banda di Hulandes nos propio idioma Papiamento a bira idioma di comunicacion tambe den documentonan oficial.

## 4 CREACION SCOL DI OFISHI DI MERDIA

Scol specialmente pa nos hobennan cu pa un motibo of otro ta cay for di sistema di educacion y no tin un trabao. Nan ta haya e posibilidad di desaroya nan talento riba diferente tereno cu nan por eherce den futuro un ofishi pa asina por mantene nan mes y nan famia na un manera honra.

## 5 INSTALACION GRUPONAN DI TRABAJO PA:

- **Club Escolar:** Club Escolar ta un proyecto pa nos mucha y hobennan. Cu lo duna nan den ora di atardi e oportunidad pa desaroya nan talento riba tereno Cultural, Arte, Musica, Baile y Deporte. Cu e proyecto aki nos lo crea un generacion hopi mas contento. Mayornan lo sa cu nan yiu ta den un ambiente sano y sigur an momento cu nan ta eherce nan labor.

- **Independisa Enseñansa Publico:** Independisacion ta miho pa Enseñansa Publico (mas oportunidad den su capacidad pleno di maneho). Independisacion ta miho pa docentenan y demas personal. Acceso pa studiantenan ta keda mescos.

- **Integracion IPA-UA:**

Cu integracion di e dos instancianan mas halto den nos enseñansa, lo garantisa miho calidad di maestronan, amplia capacidad di nan y ofrece mas posibilidad di studio avansa na Aruba mes.

- **'Aruba Prospects High School':**

Sistema di educacion 'High School' cu ta duna nos super talentonan e oportunidad pa studia y eherce nan pasion na e mesun momento. Cu e posibilidad di wordo scogi pa Colegio y Universidadnan Mericano cu 'Scholarship' parcial of hasta total.

- **Digitalisacion di Enseñansa**

Poco poco pero sigur nos sistema cu educacion tradicional mester bay over pa uno cu ta pas den e mundo digitalisa cu nos ta biba awendia. Esaki lo hisa e grado di concentracion y lo mehora e resultadonan ya for di scol basico. Un estimulo pa sigui studia y pa nos isla por conta cu mas profesional den futuro.





GOBIERNO DI ARUBA



“ Estado cu a encontra  
Bestuurskantoor aden tabata  
deplorable na e momento cu a drenta  
den gobernacion.  
Esaki tabata hopi bashi sin material  
pa por a traha y tabata un caos total.

---

**Minister** di Turismo,  
Salubridad publico y Deporte





# ✓ 100 DIA DI GOBERNACION

## 1 AMPLIA CANTIDAD DI DOKTERNAN DI CAS:

Nos a tuma e decision pa busca dos dokter di cas y asigna nan na eerstehulp pa asina por atende e pashentnan na un manera mas eficiente y baha e tempo di espera na eerstehulp. Y tambe loke ta trata e lista di espera pa specialistanan, esaki tambe ta den pipeline pa wordo concretisa.

## 2 DISPOSICION DI FONDONAN PA DRECHA INFRASTRUCTURA:

A yega na un areglo cu ATA y DOW pa pone fondo disponibel pa drecha e infraestructura banda di area hotelero caminda tin necesidad di mantencion di e infraestructura y pa haci e area mas bunita. Tambe nos a yega na un acuerdo pa bin cu rails pa e seguridad di e turista crusero banda di e area di Royal Plaza.

## 3 ARUBIG:

E ARUBIG tambe ta un punto cu nos a priminti di atende cu ne den nos gobernacion y nos por bisa cu e comision di BIG a wordo instala. E comision aki su tarea ta pa brinda e studiantenan cu a studia medicina den region e oportunidad pa por traha na Aruba.

## 4 RESTRUCTURACION DI AZV:

Nos a cuminsa cu e restructuracion di AZV y entrante 1 di April AZV lo bay conoce un director nobo y unabes e director nobo wordo conoci nos lo trece cambio nan cu e comunidad ta desea di mira den AZV.

## 5 GATEWAY 2030:

Otro proyecto grandi na caminda ta e proyecto di Gateway 2030 di aeropuerto, cu ta trata di e expansion y renobacion di aeropuerto, un proyecto di casi 300 milyon dollar. Y esaki lo bira un di e proyectonan mas grandi den e proximo 4 añanan, mirando cu e aeropuerto a yega na su capacidad maximo, ta haci e proyecto aki uno sumamente necesario. Y e proyecto aki lo ta sumamente bon pa e economia di Aruba, e lo crea trabou y tambe mas entrada pa caha di Gobierno.





GOBIERNO DI ARUBA



“ Den e prome 100 dianan di nos Gobierno nos a logra hopi y cu poco recurso. 100 dia di trabou duro pa logra haci e cambionan necesario pa nos por logra un miho Aruba basa riba un gobernacion integro y proactivo.

---

**Minister** di Transporte,  
Comunicacion y Sector Primario





# 100 DIA DI GOBERNACION



## 1 HARDIN BOTANICO:

Como parti di su plan pa conserva, proteha y fortifica e evolucion di Aruba su Sector Primario, Minister Chris Romero a cuminsa ehecuta su plan y vision pa cu Santa Rosa, cual ta encera desaroyo di diferente areanan nobo y educativo, y a cuminsa na e apertura di un Hardin Botanico. Aruba su prome Hardin Botanico lo fungi como instrumento importante pa nos Sector Primario, pero tambe lo aporta grandemente na nos enseñansa y nos economia.

## 2 ARUBUS:

Cu e meta principal pa tene e ser humano central, y como parti di e restructuracion di nos compania estatal encarga cu transporte publico, esta Arubus NV, lo studia e posibilidad pa implementa un rebaho den e tarifa di Arubus. Minister Romero ta convenci cu esnan di menos recurso mester por tin e posibilidad pa transporta nan mes pagando un tarifa cu ta ahusta na nan entrada.

Transporte ta algo vital aki na Aruba y den caso di transporte publico, esta Arubus, mester haci esaki lo mas accesibel posibel pa esnan cu ta depende di dje pa yega nan trabou.

## 3 SOLUCION DURADERO PA NOS CUNUKERONAN

For di inicio di e Gobernacion nobo aki, Minister Chris Romero ta pendiente di e necesidadnan di e cunukeronan local y ta al tanto cu nan mester di un solucion duradero pa cu e problema di scarsedad di awa y su prijs. Aruba, den e lunanan di februari pa october di cada año, conoce un sequia enorme. Esaki ta pone cu e awa cu a logra colecta durante november pa januari, no ta yega pa agricultura y cria di bestia. Uza awa di bebe pa cunucu ta costa basta placa, cual tampoco ta un alternativa.

Pa sostene cada cunukero, siman pasa Minister Romero a reuni cu compania nacional WEB NV, pa asina conhuntamente yega na posibel solucionnan.

A keda palabra cu na maart 2018 lo presenta un solucion na termino corto y tambe lo institui un 'petit comité' pa yega na un solucion duradero pa nos cunukeronan local.

## 4 RENOVACION DI DEPARTAMENTONAN:

A haci un bishita na tur departamentonan cu ta cay bou su maneho y locual a resalta cu esakinan a wordo negligia pa e gobierno saliente. Lo inverti den cada Departamento. Algun mester di renovacion urgente manera e Edificio di Departamento di Aviacion cu a ser desapropa.

## 5 A REVOCA E ENVIRONMENTAL TAX RIBA TUR AUTO DI HUUR.

Minister Romero a cambia e maneho di cada 5 año mester tin un auto nobo pa uno structura a base di inversion riba cada auto.

## 6 WIFI PA TUR SCOL:

Desde inicio di su carera politico na 2005 semper e mandatario a vocifera cu "digitale leeromgeving" lo mester ta un di e metodonan cu mester wordo treci den enseñansa na Aruba. Mundialmente esaki ta e sistema cu ya caba ta wordo implementa y den e mundo di tecnologia digital Aruba no por keda tras. Den cooperacion cu colega Minister Lampe y SETAR pronto tur scol na Aruba lo tin WiFi cu un velocidad optimal.





GOBIERNO DI *ARUBA*

## **GABINETE WEVER-CROES**

Un gobierno cu ta bisa loke e ta haci  
y ta haci loke e ta bisa

*Sinti e Cambio*